

4
2
O R A T I O
I N F V N E R E
CLEMENTIS XII

P. M.

H A B I T A

IN METROP. ECCLESIA NEAP.

AB ALEXIO SYMMACHO MAZOCHIO

EIVSDEM ECCLESIAE CANONICO

xvi. Kal. April. an. CIODCCXXXX.



WITNESSES IN THE COURT OF THE LORDS

THE
LORDS OF THE
COURT OF THE
LORDS
AND THE
LORDS OF THE
COURT OF THE
LORDS

THE
LORDS OF THE
COURT OF THE
LORDS
AND THE
LORDS OF THE
COURT OF THE
LORDS



I semper & ad omnes sanctiorum officiorum partes, Amplissimi Patres, vosque ceteri Auditores ornatissimi, Metropolitana Ecclesia signum sustulit universis: nunc quidem certe videri potuisset serius omnino, quam oportuit, lugubri apparatione funeris atrata prodire, serius CLEMENTI XII PONT. MAX. e vivis sublato parentare, ac serius denique ex hoc loco communis Parentis laudationem instituere: nisi opportune tacitis hujuscemodi vestrum cogitationibus jampridem magnus ille philosophus magni Basilii frater Nyssenus Gregorius occurrisset. Nam profecto quis mihi hoc officium non sero, sed tum, quum maxime decuit, persolutum defendenti crederet; nisi summus ille Auctor, qui esset tum hujus humanæ, tum diviniæ alterius philosophiæ studiis innutritus, aliquando Placillam Aug. extinctam laudaturus, hanc vocem usurpasset, ut diceret: (*) nullum aptius lugentibus remedium silentio diuturno existere; quo aestuans dolore animus interjecta longi temporis taciturnitate mitigetur. Nam si quis urente adhuc calamitate maturet auribus sermonem ingerere; nae is non aliud eo labore consequetur, nisi ut vulnus recens impressum mentione rerum acerbarum, sic quasi spinis lancinatum, recrudescat. At contra ubi id sensim coire jam ex medicina temporis coeperit, facile quod reliquum erit postmodum linimento orationis adhibito obducetur. Quo magis laudo consilium tuum, JOSEPH Card. SPINELLE, qui, ipse ex tanto casu haud paullo commotior quam ceteri, tuis etiam, quo commoti minus ad hoc officium accederent, tempus ad exhauriendum dolorem constituisti. Quem postquam hodie no die aliqua saltem ex parte imminutum sentio; id nunc dabo

A

ope-

(*) S. Greg. Nyss. init. orat. in Placill. Aug.

operam, Auditores, ut ejus reliquias, si quae adhuc resident, quibuscumque modis possim, ac praesertim ejus, qui lugetur, propositis laudibus, abstergeam. Quotus enim quisque est, qui non intelligat, hanc qualemcumque orationem, non tam illius sive exornandi, sive ulla parte juvandi, quam nostri solandi gratia pertexi? propterea quod cum illo quidam praeclarissime actum scitis, quod vitam aerumnosissimam cum immortali commutavit; nobiscum vero infelicissime, qui tanto parente orbat relinquimur. Quo sane fit, minus mihi verendum esse, ne quas falsas illi laudes affingens, id illius auribus dare voluisse credar, quam ne ex veris ac solidis plurimas sive circumfusus copia praeteriisse, sive propter exilitatem ingenii, atque orationis infantiam obfusasse reperiar. Tum illa quoque me cura metusque angit, ne non id quidem, cujus gratia sum huc progressus, & in quo hujus totius orationis caput esse dixi, pulchre teneam; propterea quod, quum, qui mederi vobis debeo, medica ipse ope indigeam, minime sim omnium ad medicinam faciendam accommodatus. Verumtamen accipite tandem, quibus ego rationibus adductus, vobis minime dolendum esse ducam; imo, si hoc quoque vultis, pro ea auctoritate ac persona, quam mihi in praesentia tribuistis, etiam praecipiam.

Atque ut a trita illa consolandi ratione recedam, quam scimus a viris sapientissimis usurpatam, quum monerent (*) homines nos ut esse meminerimus, in id natos, fortunae ut telis omnibus propositi simus; nec esse recusandum, quo minus ea, qua nati sumus conditione vivamus; neve quos casus nullo consilio vitare possimus, gravius feramus; utque eventis aliorum memoria relegendis nihil novi nobis accidisse reputemus; & quorum plurimum in eandem sententiam plenae sunt veterum sapientum voces, plenae chartae: ut haec, inquam, nimis jam pervulgata praetermittam; ad illa saltem, quae propius ad hanc causam faciunt, quaeso vos, mecum animos cogitationesque convertite. Nam quid est,

est, quod hoc tempore vos magnopere conturbat? aut quid
 sibi volunt illae lugentium naeniae: Heu communis Pater!
 heu Pastor! (*) *heu tristes Ecclesiae conventus sine sacerdote!*
confessus sacer coryphaeum requirit! pueri patrem, senes aequa-
 lem, optimates principem, populus patronum ac praeceptorem,
pauperes nutritorem desiderant! Haec quum pro se quisque la-
 menta editis; illius ne vicem doletis, qui ad plures abiit? Apa-
 ge, Deus misericors! a tuis cultoribus hanc tantam amentiam,
 in iis etiam vix ferendam, qui, ut ait Divinus Apostolus,
 spem non habent. Nam cum illis bene & praeclare agi, qui
 consummato certamine ad coronam evolarint, Divina nos sci-
 ta condocerant. An vestra potius causa doletis, quippe iis
 praesidiis, quae ex vivo percipiebantur, orhati? At videte,
 ne turpe atque indecorum sit, in eo luctu, quem caritatis in il-
 lum causa suscepisse videri vultis, de vestro incommodo mal-
 le, quam de illius commodo commoveri. Tum illud quoque
 meminisse debetis, non donatum illum pontificem terris fuisse,
 sed commodatum. An est quisquam tam ineptus, qui quae
 precario & ad horae usuram concedita fuer, ea si mox repe-
 rantur, succenseat? Atque hoc quidem eam vim
 habet, ut etiam si CLEMENS XII in flore ipso juventae vo-
 bis ereptus fuisset, nihil esset quod quisquam gravate ferret;
 quia sub hac conditione is natus esset. Nunc vero, Auditores,
 eequem non dico Pontificum Rom. sed ex quovis ordine mihi
 potestis ostendere, cui vitam eiusque producere datum fuerit,
 quantam certe ne *potentatibus* quidem olim Divinus Vates pol-
 licebatur? Et indignabimur, si cedrus haec Libani (quod ge-
 nus vivacissimum novimus) ex quo semel in paradiso Domini
 lata fuit, centum prope annos ad coalescendum, ad adolescen-
 dum, ad se confirmandum nata, postremo in opus Sanctuarii
 caelestis, quo jampridem destinata fuerat, praecidatur? Aut
 vero succensebimus, si pomum, ubi probe maturuerit, nec ex-

Ab 3. biron. ad 1. cassum.

(*) S. Basil. epist. ad Eccles. Neocaes.

cullum, nec avulsum, sed occulta vi senii atque maturitatis dis-
 junctum sensim ab arbore dilabatur? Dicat heic mihi
 forsitan aliquis, vixisse CLEMENTEM ad aetatem quidem
 vel diutissime, at ad gloriam resque gerendas haud satis diu;
 qui si longius aetatem produxisset, aut si vero pontificatum ci-
 tius nactus esset, multa utiliter ac praeclare gessisset. Atque
 heic, Auditores, adesse vos animis jubeo; est enim hic locus
 orationis meae longe mihi ad explicandum difficillimus, vo-
 bis multo ad audiendum jucundissimus; qui est de CLEMEN-
 TIS XII rebus gestis, numero tam multis, ut ne percrensendo
 quidem satis numerari queant; magnitudine tam splendidis,
 ut quodlibet ex iis unum, hujus pontificatum satis illustrem &
 commendabilem praestitisset. Ac nolite per vestram fidem id
 a me expectare, nulla ut a me res illius intacta praetereatur;
 qui satis sum habiturus, si, quae in mentem venerint, accerva-
 tim depromam. Ac multo etiam id minus a me debetis exigere,
 ut simul eadem amplificare dicendo, atque exornare coner.
 Quin id vos oro, ne meis ex dictis de illius virtute judicetis; sed
 contra ex his, quae perspecta vobis arbitror universis, meam ora-
 tionem adjuvetis; quaeque in ea plura desiderabitis, ea ipsi vos
 ex praeteritorum memoria suppleatis. Ita haec laudatio sic col-
 latis vestrum omnium operis perficietur; tamquam si ego, veluti
 in choro, cationum initia praecinvero, vos deinceps reliqua
 succinatis. Ac principio tam confertim mihi se plura
 offerunt, atque, ut ab se ordiar, invitant, ut non minima haec
 me cura circumstet, unde potissimum initium orationi ducam.
 A domus ne Corinae antiquitate & claritudine? Verum non
 committam, ut qui suis circumfluit laudibus, onerem alienis:
 nisi vero hoc ad illius decus pertinere volumus, quod ex splen-
 didissima prosapia natus, multo plus lucis majoribus attulit,
 quam ab eis accepisset. An ab oris ac totius corporis dignitate;
 ex cujus aspectu imago honestatis ingenitae emicaret? A pueri-
 tia; ne, quam sub providis educatoribus sancte atque innocen-

ter in litteris rerumque praeclarissimarum cognitione traduxit? An a prima adolescentia, quam Pisanae Academiae laurea cohonestavit? An ab aditu primo ad Romanae Curiae dignitates, & illa in omne tempus memorabili praefectura aerarii, tam integre, tam populariter atque abstinenter ab eo gesta, ut etiam Cardinali contra mores prorogata diu fuerit? An demum a senatoria unius omnium in terris sanctissimi concilii purpura, quam mature illi ab acerrimo virorum aestimatore Clemente XI delatam meministis? Sane id si agerem, ut loco tumultuariae orationis annales hujus viri pertexerem; per omnes hos Laurentii Corsini gradus eunti, ampla se mihi seges offerret, Nunc abunde fuerit, si Corsino Laurentio laetioribus ingeniis ad scribendum proposito, haec mihi tantum spatia ad decurrendum definiam, ut de CLEMENTE solum quae potero depromam.

Deum immortalem! quae fuit illius diei species, quo post quadrimestrem amplius Ecclesiae viduitatem CLEMENS XII Pont. Max. orbi insperanti processit! Quid nos tum prius gratulabamur? redditumne Ecclesiae Pastorem? disciplinae vindicem? afflictis perfugium? aegris solatium? universis parentem? an tamdiu id in Corsino dilatum, indignabamur? Cui vel pudentissimo non inaudita rei novitas verbum aliquod extudit gravius, debuisse CLEMENTEM, cetera unum omnium dignissimum, saltem ante decennium clavum attripere; si quidem eo gubernante vectores salvi esse vellemus? Et quae plura tunc de Corsino honorifica, at de aetate parum aequa rei miraculum exprimebat. At o praecipites hominum sententias, & judiciorum temeritatem! Tunc enim primum nostro huic saeculo ostensum fuit, quam non modo non adversa, verum etiam opportuna ad omnes partes atque utilitates senectus esset; in iis quidem certe, qui non ad hujus aevi, nec aurei jam nec aerei, sed prope dicam lutei, effigiem formati essent; sed concreti ad imaginem heroicorum temporum, heroica orbi facinora edituri procederent. Nam eccui pro-

fecto umquam ea suspicio subisset, hunc ab octogesimo suae vitae anno, quem rari Pontificum morientes attigerunt, ineuntem pontificatum, ad nonagesimum vitam fuisse producturum? hanc vero non ad quietem & inertiam compositurum, sed ad curas, labores, sollicitudines, dimicationes? Qui quo primum vestigio temporis adsedit ad gubernacula, summa statim alacritate ita rei totius publicae Christianaeque rationes ordinavit, non quasi ex improvise pontificatus incidisset nec opinanti; sed quasi se ad eum per plures annos comparasset; & ad eum ex compacto totum rei gerendae ordinem ac rationem meditatam attulisset. Quid enim? designandi ne sui Apostolici regni ministri atque adjuutores fuerunt? optimos, strenuissimos, lectissimos designavit. Subolescentium vitiorum propago avellenda? ab radicibus imis avulsi pleraque, stirpes infelicissimas in agro Domini jugiter repullulantes ferro flammaque est persecutus; Hydram septemplex Herculeam virtute superavit. Legibus ne obsequium, magistratibus reverentia, severitas iudiciis, rebus Divinis religio, templis nitor, sacerdotio dignitas asserenda? haec & plura citius perfecit, quam diceres: ac veluti sol ubi primum terris illuxit, uno simul tempore & detergit caliginem; & totum jubar affundit, suaeque luce simul omnia collustrat; sic admirandus vir ille uno tempore in omnes simul partes vim sui Apostolatus exseruit. Quae ex me forsitan aliquis, aequa illum vi ingenii prope divina, aequa celeritate consilii praeditum fuisse, putandum sit; qui tot res atque tantas unus uno tempore viderit: tum aequa alacritate; qui easdem simul conceptas, simul etiam perfecit? At equidem nego Auditores, hunc solum ac sibi relictum ea & vidisse & perfecisse. Jam tum enim, quum in Cathedra beatissimi Petri consedit, quas habuerat semper amicas ac familiares, iustitiam, religionem, misericordiam, fortitudinem, magnanimitatem, easdem sibi administras adiunxit, & in impetii sacrosancti societatem adscivit. Has in consilium perque

noctes perque dies adhibebat: harum comitatu stipatus in Cathedra, in consistorio, in cubiculo versabatur: cum his una pernoctabat, sermocinabatur, convivabatur. Eisdem ad aures insusurrantibus jus dicebat, leges pulcherrimas, edicta salutaria promulgabat: in harum sinum se totum tradidit: ad harum praecepta se conformavit. Itaque nolite quaeso percontando obtundere, quis apud CLEMENTEM plus auctoritate, plus gratia valuerit; ecqui primae, qui secundae tertiaeve admissionis, ut olim apud Caesares, amici fuerint: haud alios facile reperietis, quam quas modo nominavi matronas lectissimas, pietatem, constantiam, aequitatem, animi celsitudinem, & quae plures hujus generis latus illius comites assidue sepiebant. Percurrite, quaeso vos, animo sanctiones hujus principis saluberrimas adversus Episcopatum suburbicariorum translationes, adversus depeculatores aerarii, de coercendo luxu, de commercio, de annona, de Vaticana bibliotheca, de Syrorum, Coptorum, Melchitarum, Abissinorum monasticis institutis, de Comitibus pontificiis, illamque imprimis celeberrimam de ficiariis, quam parricidiorum, scelerumque everriculum jure appellabimus: has atque plures ubi vobiscum reputaveritis, facile intelligetis, non unam Aegeriam huic Nymphae alteri consiliariam adstitisse. At enim quid in eo magni est aut eximii, si leges sanctissimas tulerit; nisi porro idem, in quo rei caput est, res praeclarissimas egerit? Verum CLEMENTIS opera, Auditores, exposita sunt oculis omnium. Urbem paullisper oculis ac mente lustrate: ecquam urbis partem invenietis, in qua non templa, basilicas, sacella, valetudinaria, monasteria, bibliothecas, collegia hujus unius infinita vi pecuniae partim a fundamentis erecta, partim ampliata, exornata, restituta, ditata reperietis? Testis mihi sit illa Christiani Orbis Ecclesiarum mater ac princeps Lateranensis basilica; quae per tot retroacta saecula situ paene ac squalore obsita, hujus inaudita magnificentia nunc demum parem dignitati suae

suae majestatem adepta, explicata pulcherrima fronte sese com-
 mendat praetereuntibus : ingressis autem qua porticum nobi-
 lissimam, qua Andreae Corsini operis admirandi ditissimam
 Cellam ostentat, unde oculos vix queas avellere. Testis Quiri-
 nale palatium, tum aedium Apostolicae familiae accessione,
 tum Consultationis dicasterio auctius effectam. Testis lumen
 illud Orbis terrarum Vaticana bibliotheca (nam nunc quidem
 de privata Laurentii Corsini instructissima, Musarum olim &
 artium cultorum portu ac perfugio mitto dicere) verumtamen
 testis Vaticana bibliotheca, in quam quum nemo ferme supe-
 riorum pontificum non symbolam pro se quisque contulerit;
 hic non imi lecti conviva contulit longe uberrimam: nam no-
 vo ingentis aulae auctu laxatam plurimis qua editis, qua scri-
 ptis plurium linguarum codicibus praestantissimis locupletavit:
 ut jure bibliotheca illa dici Apostolica mereatur, quando ei va-
 riis linguis Divina praeconia edere datum fuit. Eodem &
 Aegyptiacas papyros convexit: eodem vasa Etrusca pulcherri-
 mi operis: eodem Regum, Caesarum, populorum rarissimos
 maximi moduli nummos, numero trecentos undetriginta (ec-
 quis vero, Auditores, in ullo Europae thesauro tot simul ma-
 xima numismata, aut tam eximia vidit?) plus trecentos in-
 quam maximae formae nummos, circulis affabre insertos; in
 quibus summa antiquitas cum quasi recenti integritate decer-
 tat: eodem sacram atque profanam plurimam gazam congestit,
 qua tamquam Aegypti spoliis hic novus Aaron Dei tabernacu-
 lum exornavit. Testis Capitolium, in quod coegit vim infi-
 nitam signorum veterum pulcherrimorum magno coemptam,
 atque hunc immensum statuarum populum in novam veluti co-
 loniam (Capitolinam ne dixerim an Clementinam?) tran-
 scripsit; ubi frequens illa mutorum propemodum civitas Ro-
 manam magnitudinem eloqui numquam desineret. Nam litte-
 ratos lapides, auro contra non caros, consulatum, numinum,
 magistratum, sacrorum, rerum domi militiaeque non vulga-
 rium

rium , ac totius testes antiquitatis aeternos (quos ab interitu vindicatos ibidem tuta in statione reposuit) tacere praestat , quam parum grate commemorare . Jam vero testis sit Aqua Virgo , quae antea neglectior , quam pro benigna venae saluberrimae copia , ab hoc repurgata , ac mirando opere est exornata . Testis Constantini arcus triumphalis , aeternum Christianae de Maxentio victoriae tropaeum , aeternum CHRISTI potentiae monumentum ; quem in situ ac squalore jacentem CLEMENS deterfit , restituit , resarcivit . Testem vero te , Urbs septicollis appello , vosque urbis quatuordecim regiones , hujus unius incredibili munificentia tum templis innumeris , tum viis , porticibus , salientibus , & omnis generis ornamentis signatae atque distinctae : vere ut hoc mihi videar esse dicturus , hunc imperii Christiani tamquam Augustum Octavianum , urbem , quam magna ex parte lateritiam accepit , marmoream reliquisse ; ac nunc demum urbem aeternam dici posse , quae ejus beneficio spiritum ac vitam numquam intermorruram accepit . At non unius urbis finibus se CLEMENTIS magnificentia tenuit , sed tamquam regius amnis longe lateque ruptis objeibus exundavit . Per te , Pontifex admirabilis , Ravennae (cui modo , non unus , ut olim Neocaesareae sub Thaumaturgo , Lycus exitialem alluvionem , alluvio & agris maciem & aëri gravitatem pariebat) per novum regii plane operis alveum Bedes & Vtente amnibus ire jussis , & campis felicitas , & caelo salubritas rediit . Per te Anconae portus , jactis in altum molibus , in proximi Ravennatis , olim sub Caesaribus nobilis , famam & celebritatem successit . Per Te infantium projectorum collegia toto ferme Pontificio in imperio sunt constabilita , creato extra ordinem praefecto ejus rei gratia viro strenuissimo : ut quam laudem misere mortalium ceteri ab assentatorum gregibus aucupantur , hanc Tu solidissimam ex ore infantium & lactentium , per Te ex orci faucibus ereptorum , merito expresseris . Ecquis vero non posset

Tibi

Tibi Hadriani Aug. elogium adtexere ? quem litteris proditum exstat (*) *in omnibus paene urbibus aliquid aedificasse, & opera ubique infinita fecisse* : nisi putidum esset a profanis principibus corrogare nomina & titulos ; praesertim quom ea gloriolae isti illecebris capti fecerint , quae Tu nimirum ad unius Dei gloriam, cui Te semper devoveras , unice referebas .

Et haec quidem, Auditores, quae dixi haftenus, regni Pontificii fines non excedunt : age illa videamus , quo pacto remotissimas quasque nationes, quarum vix antea nomen audieramus, ultro beneficiis adierit, ad easque non dominandi, sed bene merendi, sed docendi, sed ligandi atque solvendi vere pontificia jura perrexerit . Atque ut a vicinioribus ordiar : quis vestrum ignorat, quae antehac inscitiae caligo, quae errorum vitionumque colluvies per illam olim clarissimam Majoris Graeciae oram tum apud Graecos , tum apud illos Epirotarum colonos Albanenses grassaretur ? Tantum Ecclesiae vulnus paternae illius clementia non sustinuit : ad Montaltum in Brutiis erexit dotavitque collegium, ubi pueri Graecorum ad litteras , pietatem , puramque religionem informarentur . Saxoniae populos ex Lutherianae pestis afflatu jampridem a caula aberrantes quo in ovile CHRISTI reduceret, qua cohortando , qua pecunias ex bonis Ecclesiae redactas remittendo , nihil sibi reliquum fecit . Neapolitanos vero quo piaculo praeterieram ? de quibus multis nominibus optime meritis , in primis vero quod nobis JOSEPHVM Card. SPINELLVM (qualem virum, Auditores & quantum !) antistitem dederit , etiam ad Metropolitanam Basilicam exornandam subsidia contulit non vulgaria . Nec vero his tantum finibus tua se providentia continuit , Pater . Viri ut Apostolici ad Indos & ultimos terrarum Seres , & quo non ? mitterentur , nervos omnes intendisti ; ejusque rei gratia Propagandae fidei collegio plus vices fessertium dono dedisti . Coptos , Aethiopes , Melchitas Monachos paternae caritate excepisti ; ac , ne Romae The-

(*) Spartianus in Hadriano.

baidem quisquam aut Nitriam desideraret , aedes eisdem & laetitia in perpetuum praeuisti. Syrophoenicem universam , quum a patriae disciplinae severitate descivisset , misso illuc viro & orientalis litteraturae & sacrae antiquitatis callentissimo , summa cum potestate extra ordinem legato , perque hunc coacto Beryti nationis concilio , in officio continuisti . Jam

vero haec atque plura alienissimo ac difficillimo reip. tempore , armis undique in Europa , in Italia , in ipso Pontificio regno perstreptentibus , CLEMENS , fecisti ; quid porro facturus , si pax alma citius os suum terris exseruisset ? te interim maximo semper apud Catholicos principes pacis auctore , cohortatore , ac sequestro ; ejus consilia numquam aliud , nisi pacem , nisi pacis artes spectarunt . Nam pacis alumnas litteras quanto opere foveris , juveris , ornaveris , & longum sit enarrare ; & me tacente complures academiae , quae vel auctore te vel sodale gloriantur ; immensa operum volumina , suafore te , & sub tuis auspiciis evulgata ; typographia Vaticana ad Orientalium librorum editionem a te maximis auctibus amplificata ; universi litterarum cultores sub te tum Cardinale , tum Pont. Max. tamquam sub Maecenate altero , spiritum ducentes testificantur . Quid architectonice ? Quid statuaria & pictura ? Quid tessellata opera illa , nunc quum maxime perquam scitissime picturata ? Quid tot aliae artes pulcherrimae ? nonne summopere a te promotae omnes , ac multis partibus illustriores effectae , quam eas accepisses ? Quid chalcographia ? quanti hoc tibi stetit , ut diu intermortuam , populo Quiritium sifteres redvivam ? tum quanti , ut tuâ illam providentiâ tuisque impendiis plane immortalē in omne seculum tempus efficeres ?

Magnū hoc , Auditores , est , atque haud scio an incredibile , unum hominem tot atque tantis operibus , tum numero , tum genere admirabilibus atque ingentibus suffecisse : tum majus id etiam , quod brevi tempore , simul a se meditata , inchoaverit perfecitque : at illud longe maximum , planeque inauditum ; quod haec , &

quae

quae plura de CLEMENTE loquentur historiae , & aetate de-
 vexa , & afflicta valetudine , nec raro decumbens , eniti & co-
 nari potuerit . Cum quonam enim heroicorum temporum te ,
 Pater , ac virtutem conferam tuam ? Nam & fabulosus Hercu-
 les ille , Nessi cruore delibutus , animo & viribus concidit . Te
 vero nihilne vigiliae , nihil stomachi languor , nihilne acer-
 bissimi pedum dolores , qui corpusculum , sic quasi aedificium ,
 ex imis basibus concutiebant , de gradu celsissimae mentis deji-
 cere potuerunt ? jamne videtis , Auditores , quod ille aiebat , ca-
 put imperare , non pedes ? Tum nihilne horum umquam a se-
 mel inita vitae ratione removit ? Idem semper actum in
 orbem redeuntium cursus : eadem ad formidandi ministerii
 pensum alacritas : eadem horis omnibus sui conveniendi , allo-
 quendi , secum expostulandi potestas imis aeque ac summis
 fiebat ; quos sine ullo discrimine omnes auscultabat , comple-
 cebatur , fovebat , aut futuros voti compotes , aut repulsam
 ipsam in lucro posituros : nullo non tempore commodus , co-
 mis , benignus ad extremum usque spiritum , solitus dice-
 re , imperatorem stantem mori oportere . Jamque
 animadvertitis , Auditores , ultimum vitae illi , mihi
 orationis , actum instare : quem locum solent funebrium
 laudationum artifices sedulo refugere , & tamquam Syr-
 tim aut Maleae sinum artificiosa orationis declinatione devi-
 tare . Mihi contra nihil videtur esse , in quo aeque oratio mea
 triumphatura esse videatur . Qualis enim & quanta species ulti-
 morum dierum fuit , quum novus hic Isaac , oculis prae senio
 caligantibus , filiorum corona stipatus decumberet ! Obseraban-
 turei jam ad figuram hujus saeculi lumina ; dum interim ad
 immortalitatem patefierent , in cujus limen gressum jam infe-
 rebat . Quem putatis , Auditores , in ipso vitae mortisque confi-
 nio primum obvium habuisse , nisi beatissimum Andream Cor-
 sinum gentilem suum ? quem vivus tanto opere exornavit ; in
 cujus natali die , sic quasi de abitione commonitus , ad iter se
 com-